


DS  
751  
L48A2  
1705  
V. 14



EAST ASIAN LIBRARY  
UNIVERSITY OF TORONTO LIBRARY  
130 St. George Street  
8th FLOOR  
TORONTO, CANADA M5S 1A5







宋李忠定公文集選卷之十九

詩

罷相後及  
謫鄂渚作

詩以風刺爲主、故曰上以風化下、下以風刺上、  
主文而譎諫、言之者無罪、聞之者足以戒、三百  
六篇、變風變雅、居其大半、皆有箴規戒誨美刺  
傷閔哀思之言、而其言則多出於當時仁人不  
遇、忠臣不得志、賢士大夫欲誘掖其君、與夫傷  
讒思古、吟咏情性、止乎禮義、有先王之澤、故曰  
詩可以群、可以怨、小弁之怨、乃所以篤親親之  
恩、鴟鶚之貽、乃所以明君臣之義、谷風之刺、乃





所以隆夫婦朋友之情、使遭變遇閔、而泊然無  
心於其間、則父子君臣朋友夫婦之道、或幾乎  
息矣、王者跡熄而詩亡、詩亡而後離騷作、九歌  
九章之屬、引類比義、雖近乎悱然、愛君之誠篤、  
而嫉惡之志深、君子許其忠焉、漢唐間以詩鳴  
者多矣、獨杜子美得詩人比興之旨、雖困躓流  
離、而不忘君、故其辭章慨然有志士仁人之大  
節、非止模寫物象風容色澤而已、余舊喜賦詩、  
自靖康謫官、以避謗輟不復作、及建炎改元之  
秋、丐罷機政、其冬謫居武昌、明年移澧浦、又明



年移海外自江湖涉嶺海、皆騷人放逐之鄉、與  
魑魅荒絕、非人所居之地、鬱悵亡聊、則復賴詩  
句、攄憂娛悲、以自陶寫、每登臨山川、嘯味風月、  
未嘗不作詩、而發不恤緯之誠、間亦形於篇什、  
遂成卷軸、今蒙恩北歸、哀葺所作、目爲湖海集、  
將以示諸季、使知往返萬里、四年間、所得蓋如  
此云、庚戌清明日、梁谿病叟序、

九月八日渡淮

長淮渺渺煙蒼蒼、扁舟初脫隋渠黃、平生見此爲開  
眼、况復乞身還故鄉、嗟余涉世誠已拙、徑步不虞機



弈設、空餘方寸炳如丹、北望此時心欲折、楚天清曉  
作輕寒、黃蘆着霜聲正乾、川迴金碧隱牽堵、風遠鍾  
磬聞龜山、鰲聲嘔軋歸何處、笑指江皋尋舊路、松菊  
荒蕪欲自鉏、盜賊顛飜非所懼、時聞錢塘盜作故云蟹螯菊蕊  
風味適、且須爲盡黃金舟、世間種種如夢電、此物能  
消萬古愁、

次韻季弟善權阻雪古風

歲晏江南三尺雪、奕奕濛濛遂連月、意濃豈是天網  
疎、勢重便疑坤軸折、溪行小艇碎瓊瑤、自勝縞帶隨  
車轍、暝投蘭若寄僧房、更覺千巖鳥飛絕、憶昔宣和



全盛年、嘉瑞應期來自天、千官朝賀未央裏、仰視龍  
尾垂蜿蜒、珠樹熒煌青瑣闥、玉花浮動蒼龍闕、但將  
歌舞賞清妍、宥信山河會分裂、自從國步多艱難、胡  
騎長驅窺漢關、陰風慘淡隨殺氣、見雪翻使摧心顏、  
古來治理初無別、中國寢強胡寢滅、坐令和氣變陽  
春、肉食于今未宜忽、迂愚放逐恩已寬、敢憚道遠貂  
裘寒、空餘炯炯寸心赤、中夜不寤憂千端、素髮飄蕭  
頭已滿、百年光景行將半、未知夢幻此生中、幾回看  
雪光凌亂、會當掃蕩豺狼穴、國耻乘時須一雪、酒酣  
拔劍斫地歌、心膽開張五情熱、中興之運期我皇、江



漢更灑繫臣血

善權卽事

荆溪移權雪漫漫、皓色連空眼界寬、練帶縈迴迷罨  
畫、玉屏齒翠失銅官、風飄珠蘂來玄圃、槎泛銀潢到  
廣寒、安得丹青似摩詰、生綃寫作畫圖看、

其二

山崦溪灣三四家、竹籬茅舍暮煙斜、仙村自種田田  
玉、梅徑疑開處處花、近渚冰銷迷浴鷺、遠林煙暝數  
棲鷗、年年值雪長爲客、對此淒然感歲華、

其三



小童又報雪花飛、深注爐煙欲起時、浙瀝乍聞經竹葉、飄蕭初看著松枝、南人共訝何曾見、北顧深顰有所思、牢落無言自搔首、却驚華髮頓成絲、

寓寧國縣圃中桃李雜花盛開感而賦詩

春光不爲干戈薄、花縣縱觀桃李開、可惜繁華勞剪刻、莫教風雨便殘摧、溪山有意相輝映、蜂蝶多情自往來、應笑逐臣心似鐵、客中扶病亦登臺、

詠草

夢覺池塘碧草萋、風搖煙濕已菲菲、緜緜山色不知遠、惆悵王孫何日歸、微質亦知煩雨露、寸心終欲報



春暉芳根縱腐猶能化、舞蝶流螢到處飛、

黥歛道中士人獻牡丹千葉有盈尺者爲賦此

詩

平生愛花被花惱、每見牡丹常絕倒、自從喪亂減風  
情、兩年不識花枝好、邇來謫墮煙雨中、行色日與春  
光濃、今夕何夕見粲者、頗類壽安千葉紅、豈知黥歛  
深山裏、乃有此花端若此、不論玉板與鶴翎、可亞姚  
黃并魏紫、嫣然見我如感傷、似訴處此非其鄉、吾衰  
多病不解飲、對爾歎息空持觴、人言老境花如夢、猷  
此慇懃情已重、蠟封瓶貯可多時、惆悵洛陽今不貢、



望廬山

多年不省廬山面、江上初從望中見、秀骨蒼顏五老人、顧我欣然如素善、香爐峯頂紫煙浮、瀑布遙看銀漢流、雲舒霧卷互明滅、倏忽變態無停留、却疑清夢尋丘壑、風物何爲宛如昨、縱令真是夢中看、夢未覺時良不惡、平生所願今乃償、寬著日月遊山房、青鞋布襪久已辦、百錢掛杖聊徜徉、

五老峯

五峯秀出如五老、鬚髮蒼然長美好、問之不肯道姓字、儼若子房從四皓、商山採芝亦已久、漢庭辟穀何



其早、優游相與定儲皇、攜手江湖共幽討、化爲峯石  
寄山顛、下視塵寰真電掃、衣冠想像猶偉然、容貌至  
今初不稿、祇應明月見當時、間有白雲來問道、逝將  
築室近峯前、歲晚相依得相保、

歸宗寺鸞溪

溪流宛轉若翔鸞、翠色涵虛特地寒、底事舞餘窺碧  
沼、祇應誤作鏡中看、

戲賦墨畫梅花

道人畫手真三昧、力挽春風與遊戲、露枝煙蘂忽嫣  
然、自得工夫畦徑外、由來黑白無定姿、濃淡間錯相



參差、炯如落月耿寒影、翳若宿霧含疎枝、群芳種種  
徒繁縟、脫畧丹青尤拔俗、妙質聊資陳氏煤、幽姿好  
伴文生竹、世呼墨竹爲墨君、此花宜稱墨夫人、鉛華  
不御有餘態、世間顏色皆非真、年來妙觀齊空色、天  
花時露真消息、試煩幻出數千枝、不費梁谿一丸墨、

堯率寺

隨意寓禪房、小軒風露涼、山幽雲傍戶、林迥月窺牀、  
竹色曉增翠、桂花秋欲香、無人知此意、天影碧茫茫、

玉溪寺

玉溪何日寺、古佛亦塵埃、高閣雲初卷、小池蓮半開、



竹風清枕簟、松露滴莓苔、寂寞溪山路、幽人自往來、  
過苦竹嶺二首

絕嶺橫鳥道、江湖從此分、沉吟洞庭夜、悵望具區雲、  
去住本非我、別離空念群、子規啼苦竹、腸斷不堪聞、

其二

今日江湖境、雙眸嶺上明、山光隨地好、秋氣逼人清、  
隴水初分處、雲鴻欲別情、離群古來有、嘆息未休兵、  
次通城送季言弟還錫山

半載相從作遠遊、物華冉冉又新秋、江南山水共清  
賞、湖外風煙成獨留、家遠爲傳安穩信、時艱增重別



離憂、渚宮此去無多地、悵望猶登黃鶴樓、

寄王周士

年來百念冷於灰、夢到江湖又一回、從此故人音問  
近、洞庭秋色鴈初來、

寓居通城僧舍東軒池蓮盛開竹菴珪老有意  
見過戲贈此篇

道人菴外萬竿竹、何似小池千葉蓮、月白風清誰共  
此、心閑境寂兩條然、好拋筠粉娟娟淨、來看荷珠的  
的圓、飛錫倘能真過我、直須趲取未霜前、

張子公以圓鑑見寄作詩報之



我觀大圓鑑、瑩澈靡瑕垢、清光溢寒蟾、碧井窺古甃、  
冰池絕塵埃、玉壁遜肉好、不知何年鑄、款識雜篆籀、  
冷然照肝膽、况燭鬚眉秀、英英張子公、輟贈意獨厚、  
使我正衣冠、更以別妍陋、嗟予罹百憂、半世困馳驟、  
蒼浪齒髮衰、已覺成老醜、幸茲置安閑、閉戶念往咎、  
冠欹與珮落、顛倒聽襟袖、平生遭謗讒、白黑坐分割、  
逝將杜德機、漸可塞智竇、豈徒齊美惡、端欲一昏晝、  
鑑焉何所施、無乃虛授受、聊持戲鳳匣、藏此蟠螭鈕、  
精光祕不露、猶使魑魅走、詎逃鸚鵡形、時作蛟龍吼、  
君看方寸間、此物誰蔽覆、靈臺湛虛明、廣博含宇宙、



纖毫莫凝結、萬象悉籠囿、寧隨古今移、不逐面目皺、  
人人各具足、一一謝雕鏤、無塵安用拂、表裏自通透、  
諸佛亦何爲、四智此爲首、祖師持出遊、法器久已就、  
那將清淨眼、更入煩惱蔕、隨緣夢幻中、坐閱蠻觸闘、  
本來妙明心、一念證無漏、持此還寄君、試問承當否、

飛雲

飛雲遊碧虛、夭矯龍蛇勢、因風態無窮、抱日色增麗、  
飄然欲安歸、出岫非本意、爲霖竟何成、跋望增嘆喟、

落葉

蕭蕭一葉已驚秋、况復紛紛巧見投、振稿不禁風漸



浙催寒長共雨颼颼、洞庭波起初微脫、雲夢霜高浩  
不收、舞砌穿帷不須掃、牢騷從伴逐臣愁、

西風行

西風隕高梧、秋暑退殘熱、豈不欣微涼、寤歎驚急節、  
歲華聿云暮、露氣繁霜結、干戈隨凝陰、虜騎壯勝鐵、  
邊防久凋殘、河洛據戎羯、中原無長城、何以限逸越、  
傳聞今年春、閔輔已喋血、強兵健馬區、乘間肆陵蔑、  
况茲柔脆鄉、豈復勞齟齬、江漢非不深、天險爲人設、  
要害無重兵、一蒿自可絕、恬然不爲備、廟筭豈有說、  
翠華果何從、大計宜早決、緬懷沙漠寒、矯首望漢月、



杳無鴻雁來、寧不野鼠掘、何時金鳳輦、復返蒼龍闕、  
群生有安堵、國耻稍一雪、努力肉食謀、傍觀已心折、



杏 譜



宋李忠定公文集選卷之二十

皖桐左光先羅生選

明宗人李春熙

宋李綱伯紀著

宗裔李嗣立較正

宗後學李榮英芳重訂

詩

建炎行

余去歲初夏自長沙聞尹京之命率義旅入援  
王室次繁昌得元帥府檄審庠破都城二聖北  
遷號慟幾絕至當塗見赦書上登寶位且喜且



悲意欲一到行在覲新天子道膽中所欲言者  
卽丐歸田里此其志也行次淮楚間忽聞已告  
庭除拜荷特達之知感極而泣以六月朔抵南  
都有旨執政出迓賜燕於金果園具奏丐免詔  
卽入城是晚召對內殿敘陳國家禍故上嗣位  
慰天人之望泣謝首被選用顧才力不堪弗敢  
當乞遶擇足以副公議者上慰勞久之卽遣御  
藥押赴都堂治事翌日再對復力辭三上表章  
皆優答不允是時僞楚張邦昌以太保同安郡  
王領三省事五日一會都堂卽建言邦昌僭竊



不宜與政臣不可與同列凡受僞命者皆宜正其罪以爲臣子之戒具奏十事皆當時急務度能從乃敢受命有旨付三省施行又與執政廷辯至泣拜以辭上感動始罷謫邦昌與受僞命者翌日乃受告因爲上規畫所以捍禦金寇奉迎鑾輿之策且謂河北河東國家之屏蔽雖頗爲虜所陷沒然其兵民戴宋之心堅甚朝廷不議救援使其力屈而附賊爲患非細於是薦張所招撫河北傅亮經制河東二人者皆有將帥材具甲兵錢糧而遣之又請車駕一至京師見



宗廟、慰都人之心、度未可居、則巡幸南陽、駐蹕、示不棄中原、而西通關陝、可起兵馬、東通江淮、可運糧餉、南通嶺蜀、可取貨財、北援三都、兩河、與賊爭利、天下形勢、莫便于此、有旨遣使經畫、又勸上益募兵買馬、繕器械、修軍政、擇將帥、置帥府要郡、以經畧天下、是時劇賊李昱擾山東、杜用超淮南、李孝忠亂襄漢、皆遣將討平之、其餘降者十餘萬、皆分隸諸將、使渡河討賊、纔兩月間、威令稍振、竊以奉令承教、可幸無罪、中興之功、庶幾可成、不意同列者害之、陰以巡幸東



南爲安動上意、八月五日告廷遷左僕射、旣命  
二相矣、於是顯沮張所、而罷傅亮連數日爭之  
不可得、則丐罷政、奏上謂方朝廷艱難、不敢充  
位、備員、以虛負天下之責、章三上再押入一對  
後殿、力求去、上度不可留、乃除觀文殿大學士、  
提舉杭州洞霄宮、泛舟東歸、已而言者交章、詆  
在相位、施設不當、且誣以傾家貲、犒叛卒、聞者  
駭愕、賴天子睿明、有以察其不然、姑褫職、俾以  
宮祠居武昌、聞命旣上、道適瀕江、盜賊擾攘、間  
關道路、踰半年、始達湖外、追思前事、恍如夢寐、



而連年奔走、繚絡萬里、初不知其所以然、夫出處去就、大臣常事、不足道也、然金人今春果擾關輔、蹂踐京東西河北兵民、叛爲盜賊、皆如所料、鑾輿遠幸、未有可還之期、翠華飄泊、未有定居之所、生民未休息、中國未定安、此臣子之所夙夜痛悼而寒心者也、噫、天寔爲之、謂何哉、掇

取出處去就大槩賦詩百二十韻、目之曰建炎

行覽者庶有感云、

鑾輿遠幸謂徽欽北遷沙漠也翠華飄泊謂高宗避狄明州也

金寇初犯闕、太歲在丙午、殊恩擢樞廷、愧乏涓埃補、兩河未奠枕、杖鉞出宣撫、乞身緣謗讒、竄謫旅湘澌、



明年丁未夏、被命尹天府、頓聞環京畿、四面盡豺虎、  
金湯雖可恃、憂在人不禦、見危思致命、入援乘義旅、  
旌麾亘江湄、畏景觸隆暑、忽傳元帥檄、果有城破語、  
鑾輿幸沙漠、妃后辭禁籞、皇孫與帝子、取索及稚乳、  
禮文包旂裳、樂器載筍虡、金縢罄公私、技巧到機杼、  
空餘宗廟存、無復薦簋簠、淒涼蒼龍闕、寂寞玉華廡、  
疇能供御粟、誰與猷肥羜、無從執羈勒、安得生翅羽、  
號慟絕復蘇、灑淚作飜雨、繼聞宣赦書、寶位登九五、  
神明有依歸、率土盡呼舞、皆言湯武姿、勇智天所與、  
向來使賊營、英氣讐騎虜、建牙出危城、帝命續鴻緒、



不然艱難中、何以脫貔貙、茲讐不戴天、兄弟及父母、  
靠膽思報吳、枕踐懲在莒、齊侯何足稱、句踐不須數、  
周漢獲再興、宣光定神武、願言覲行在、玉色親黻黼、  
丹誠遂披陳、祕策得宣吐、謀身計雖拙、許國心獨苦、  
片言儻有合、丐骨歸櫓、飛帆過金陵、鼓枻適淮浦、  
遙傳告大廷、命相比申甫、顧茲斗筭器、何以動堯禹、  
深惟特達知、感慨激肺腑、如何日月光、可以螢爝助、  
舍舟行汴堤、驅車赴延佇、傷心兵火餘、民物亦凋瘵、  
中使乘駟來、茶藥寵賜予、拜恩丘山重、坐使瘵癘愈、  
行行近南都、戈甲震金鼓、將佐迎路傍、往往多舊部、



冠蓋如雲屯、賜宴金果圃、謝免徑造朝、淚落濕屐、礎、  
初稱宗社危、天地同憤怒、次陳國多難、寔啓中興主、  
未言擣散材、初不堪梁柱、鼎顛將覆餗、棟橈必傾宇、  
况茲扶顛危、正賴肱與股、大舜舉皋陶、小白相仲父、  
耕莘與釣渭、端不乏伊呂、惟當博詢訪、考慎作心膂、  
封章屢懇辭、帝曰莫如女、往作礪與舟、不復容偃僂、  
叩額宸扆前、臣敢論僞楚、易姓建大號、厥罪在砧斧、  
柰何坐廟堂、乃與臣等伍、更效老獵師、十事聽裁處、  
天子亮精誠、一一皆可許、因陳禦戎策、用此敢予侮、  
河外須救援、屏蔽資捍拒、問誰可驅策、因薦亮與所、



京師當一到、九廟陳鼎俎、却爲巡幸計、不可去中寓、  
南陽光武興、形勢亦險阻、西通關陝區、東與江淮距、  
三巴及嶺海、寶貨可運取、據要爭權衡、黠虜謀必沮、  
募兵益貔貅、買馬增牧圉、號令新幟旗、仗械飭干櫓、  
軍容久不振、整頓就規矩、潢池盜弄兵、群惡相嘯聚、  
偏師命剪除、快若貓捕鼠、餘寇悉欵降、分隸歸籍簿、  
蒐裒將帥材、賞罰頗有序、經營年歲間、庶可事大舉、  
城虜還兩宮、雪耻示千古、却隆太平基、不愧宗與祖、  
豈知肘腋間、乃有椒蘭妬、含沙射影、聚毒陰中蠱、  
規模欲破碎、謀議漸齟齬、固知顛峭姿、自不敵媚嫵、



恨無回天力、剔此木中蠹、安能破銅山、但志燃郿塢、  
時危敢尸祿、抗疏願引去、涕泗對冤旒、非不戀軒宇、  
君臣以義合、無使赭舂杵、帝度不可留、乃聽上印組、  
扁舟返東吳、却理梁谿艫、多言更萋菲、貝錦成罪罟、  
尚荷皇天慈、薄譴居鄂渚、我來雪霏霏、及此歲將暮、  
崎嶇山谷間、避寇如避弩、行盡江南山、始踏湖北土、  
風煙愁浩蕩、鴻鴈析儔侶、沉吟白雲飛、悵望黃鶴翥、  
晴川俯漢陽、葭莢滿鸚鵡、家山渺安在、幽夢到別墅、  
三年再謫官、繚絡萬里路、浮游幻境中、塵跡嘆仰俯、  
翠華尚蒙塵、吾敢念門戶、但嗟機會失、事勢契先覩、



今年虜益橫、春夏蹂京輔、萬騎掠秦關、餘毒被陳汝、  
五陵氣葱葱、中原鬱膺膺、弃置不復論、彌望皆莽鹵、  
旌旆滿江淮、寇抄連齊魯、六飛竟何從、秋晚尚江滸、  
何時包干戈、禮瑞奠璜琥、斯民安田疇、餘穀棲廩庾、  
四方道路通、舟車走商賈、吁嗟呼蒼天、乃尔艱國步、  
譬猶大厦傾、著力事撐拄、居然聽頽覆、此身何所措、  
又如抱羸瘵、邪氣久已痼、不能親藥石、乃復甘粃黍、  
膏肓骨髓間、性命若綵縷、安得和緩徒、舉手爲摩拊、  
馴致海宇康、蒼生有環堵、

秋夜有懷



坐失金湯險、搖搖翠蓋飛、空聞八駿御、不見六龍歸、  
天地干戈滿、瀟湘鴻鴈稀、漢宮秋夜小、依舊照彤闥、  
聞山東盜所謂丁一箭者、擁數萬衆臨江破黃  
州官吏皆保武昌、江湖間騷然未知備禦之策  
感而賦詩

時危貴權謀、盜賊本王臣、招徠駕馭之、自足張吾軍、  
蠡蠆固有毒、犀象亦可馴、恩威倘得所、摩拊還其淳、  
光武制銅馬、曹公用黃巾、資其戰大敵、且以蘇良民、  
去年議招撫、乃以此義陳、置司未閱月、來者如屯雲、  
奈何力沮罷、坐使復紛紛、傳聞中原寇、鐵馬動成群、



虎兇出於匣、玉石同其焚、京輔困抄掠、遂及江湖濱、  
東南久平定、郡縣無城閫、天塹非不險、誰與守要津、  
古來重鎮地、控扼非其人、小敵已震懼、大者當何云、  
人謀自回遹、天意詎不仁、安得迴陽輝、一令四海春、  
夢故作江湖波浪聲、

松風

歲晚蒼龍鬢髮青、回風披拂自悲鳴、不容逐客多歸  
淵聖皇帝賜寶劔生鐵花感而賦詩

靖康虜騎窺帝闕、中原慘澹生煙塵、帝謂細柳真將  
軍、總兵欲使揮浮雲、解賜寶劔御府珍、魚腸盤屈松

檜紋縷金錯翠舟瑤琨、剗戮犀象如羔豚、驅逐狂寇  
出邊垠、妖腰亂領徒紛紛、龍吟蛟吼清夜聞、乃知此  
物能通神、邇來杜門空念恩、舊事誰復可共論、今晨  
開匣觀龍文、鐵花繡澀蒼蘚痕、東南卑濕相蒸薰、坐  
使三尺光鉞昏、安得礪砥來峨岷、淬鋒歛鋸劓發新、  
霜寒冰滑無散皴、指揮尚可清妖氛、願提此劒平戎  
獯、犬羊雖衆氣可吞、手斬可汗羈可敦、天旋日轉還  
兩君、書銘却勒燕然勲、攄憤刷耻志乃伸、壯懷聊可  
垂乾坤、緹繡十襲傳仍昆、衛綰之賜何足云、

胡笳十八拍



昔蔡琰作胡笳十八拍後多做之者至王介甫集古人詩句爲之辭尤麗縟悽婉能道其情致過於創作然此特一女子之故耳靖康之事可爲萬世悲暇日效其體集句聊以寫無窮之哀云

第一拍

四海十年不解兵、朝降夕叛幽薊城、殺氣南行動夷軸、犬戎也復臨咸京、鐵馬長鳴不知數、虜騎憑陵雜風雨、自是君王未備知、一生長恨奈何許、

第二拍

黑雲壓城城欲摧、赤日照耀從西來、虜箭如沙射金  
甲、甲光向日金鱗開、昏昏闇闇閉氛祲、六龍塞急光  
徘徊、黃昏胡騎塵滿城、百年興廢吁可哀、

第三拍

千乘萬騎出咸陽、百官跣足隨天王、翠華搖搖行復  
止、胡塵暗天道路長、金盤玉箸無消息、色難臭腐食  
風香、晚將末契託年少、遂令再往之計墮渺茫、

第四拍

筋韁精堅胡馬驕、猛蛟突獸紛騰逃、春寒野陰風景  
暮、塵埃不見咸陽橋、中原格鬪且未歸、隴山蕭瑟秋



雲高、安得壯士兮守四方、一豁明主正鬱陶、

第五拍

漢家離宮三十六、緩歌謾舞凝絲竹、鐵騎突出刀鎗鳴、  
驚破霓裳羽衣曲、明眸皓齒今何在、細柳青蒲爲誰綠、  
桃花依舊笑春風、風動落花紅簌簌、

第六拍

憶昔霓旌下南苑、攀條弄芳畏日晚、只今飄泊干戈際、  
寒盡春生洛陽殿、梨園弟子散如煙、白馬將軍若雷電、  
城上春雲覆苑牆、回首何時復來見、

第七拍

星宮之君醉瓊漿、矯如群帝驟龍翔、龍池十日飛霹  
靂、齊言此夕樂未央、玄圃滄洲莽空濶、羽人稀少不  
在傍、深山窮谷不可處、託身白雲歸故鄉、

第八拍

黃塵散漫風蕭索、殺氣森森到幽朔、五十年間似反  
掌、瑤池侍臣已冥寞、千崖無人萬壑靜、旌旗無光日  
色薄、萬事反覆何所無、注目寒江倚山閣、

第九拍

五陵佳氣無時無、龍種自與常人殊、一去紫臺連朔  
漠、骨肉滿眼身羈孤、金鞭斷折九雁死、邂逅豈卽非



良圖、人間俯仰成今古、豈憶當殿群臣趨

第十拍

人生失意無南北、去住彼此無消息、黃蒿古城雲不  
開、時復看雲淚橫臆、猛將腰間大羽箭、一箭正墜雙  
飛翮、汝休枉殺南飛鴻、道路只今多壅隔、

第十一拍

天子不在咸陽宮、翠華拂天來向東、江間波浪兼天  
湧、中有雲氣隨飛龍、干戈兵革鬪未止、無復射蛟在  
水中、江邊老人錯料事、時危慘淡來悲風、

第十二拍

漁陽突騎獵青丘、天馬跋足隨犂牛、幕前生致九青  
兕、苦寒贈我青羔裘、萬里飛蓬映天過、歲云暮矣增  
離憂、如今正南看北斗、長安不見使人愁、

第十三拍


聖朝尚飛戰鬪塵、椎鼓鳴鍾天下聞、岸上荒村盡豺  
虎、衣冠南渡多崩奔、何時鑄戟作農器、欲傾東海洗  
乾坤、干戈未定失壯士、舊事無人可共論、

第十四拍

大麥乾枯小麥黃、問誰腰鑱胡與羗、漢家戰士三十  
萬、此豈有意仍騰驤、安得突騎只三千、長驅東胡胡



走藏

潼關掃螻蟻、爲留猛士守未央

第十五拍

我生之後漢祀衰、經濟寔藉英雄姿、遙拱北辰纏冠  
盜、杳杳南國多旌旗、傷心不忍問耆舊、耆老惡聞戰  
鼓悲、中夜起坐萬感集、誰家搗練風淒淒

第十六拍

雨聲颼颼催早寒、歲暮窮陰耿未已、燕山雪花大如  
席、寒剖肌膚比風利、群胡歸來血洗箭、陣前部曲終  
日死、漫漫胡天叫不聞、日夜更望官軍至

第十七拍

時危始識不世林、成王功大心轉小、豺狼塞路人斷絕、一門骨肉散百草、江頭宮殿鎖千門、不知明月爲誰好、何時眼前突兀見此屋、鷄鳴問寢龍樓曉、

第十八拍

風塵瀕洞昏王室、咫尺波濤永相失、漂然時危一老翁、灑血江漢長衰疾、筵一會兮琴一拍、青山落日江湖白、身欲奮飛病在牀、此心炯炯君應識、

重陽日醉中戲集子美句遣興

青山落日江湖白、漂零已是滄浪客、老去悲秋強自寬、青蘂重陽不堪摘、東流江水西飛燕、傳語風光共



流轉急觴爲緩憂心擣、休語艱難尚酣戰、聖朝尚飛  
戰鬪塵、何用浮名絆此身、時復看雲淚橫臆、晚來幽  
獨恐傷神、

其二

籬邊老却陶潛菊、開花無數黃金錢、且看欲盡花經  
眼、飲如長鯨吸百川、只今漂泊干戈際、方外酒徒稀  
醉眠、腐儒衰晚謬通籍、杜曲幸有桑麻田、故畦遺穗  
已蕩盡、中原君臣豺虎邊、安得務農息戰鬪、武陵欲  
問桃花源、

趙叔薄運判見示宣和御畫二軸其一馬舉足

奮迅將起絕去筆墨畦徑意態如生伏觀歎息  
因賦詩以贊揚宸翰且敘小臣悽憤之情云

宣和天廡多清新、肉髯汗血皆翔麟、  
圉人牽來赤墀下、宸筆落紙親傳神、  
非行非立非馳逐、獨寫騰身  
前舉足、展沙奮迅欲嘶風、  
驤首驟驪初噴玉、流雲飛電  
五花駮、庭前榻上雙真龍、  
始知韓幹畫多肉、坐使冀  
北群皆空、鑾輿遠狩龍荒外、  
八駿瑤池杳何詰、空留  
此馬落人間、感憤暗灑纍臣涕、

摘鬢間白髮有感

吾生足憂患、未老頭已白、  
鬢間垂素絲、攬鏡聊一摘、



星星去雖欣、種種鮮還感、頗愁日增多、盡拔復何益、  
追思少年時、綠髮光且澤、森然茂雲松、豈謂少堪惜、  
自從多病後、脫落露廣額、蒲柳姿易衰、日與風霜迫、  
蕭蕭不勝梳、擾擾僅盈掬、安能上指冠、常恐吹墮幘、  
年來涉艱虞、更復非夙昔、奔馳動萬里、漂泊繼三謫、  
縱橫蹈危機、侈哆困頻噴、交遊莫援手、仇怨惟下石、  
素標宜滿頭、斑鬢未爲逼、何年運河車、沂補泥丸宅、  
華顛復變鬢、去作煙霞客、憔悴楚江濱、歲晚將何獲、

冬日閒居遣興六首

歲暮碧山中、清霜日自濃、隱牀吟蟋蟀、拂盞老芙蓉、

風月成三友、家山夢九龍、道人知睡美、將曉小鳴鐘、  
其二

飄泊向江城、山居境過清、霜深猶竹色、風勁更松聲、  
且進杯中物、何須身後名、擁爐孤笑處、寒夜又三更、

其三

蘭若富雲松、吾生寄此中、無心復彈劍、有恨但書空、  
白菊因霜紫、青楓向日紅、晚來幽獨甚、臥聽竹間風、

其四

深炷一爐香、孤吟夜正長、山虛風落木、雲破月窺房、  
老驥志千里、越禽思故鄉、羈棲兩寂寞、坐歎鬢毛霜、



其五

投老見多難、干戈日更深、飲河胡馬健、破壘漢疆侵、  
大將未燕首、小臣空越吟、龍荒兩宮遠、感憤淚盈襟、

其六

僻處掩松門、知非更念恩、庭空從鳥噪、山煖覺蜂喧、  
木葉靜如掃、茶花開正繁、蕭條歲云暮、倚杖自忘言、

食橘

洞庭一夜天、雨霜橘林綠、苞朝已黃、遠題書後三百  
顆、入手便覺秋風香、黃金爲膚、白玉爲瓤、沆瀣深貯其  
且芳、雕盤粉斲、曄清霧、冰齒乍嚼、流瓊漿、色香氣味

紛可喜、下視衆果皆茫茫、嗟余平生愛種此、木奴千  
樹梁谿傍、只今蒿艾已埋沒、豈敢向日爭熒煌、蓬萊  
雲氣久寂寞、漢殿無復羅蕭湘、厥包縱有盡醲澹、剖  
之蟲朽安足嘗、乃知汝病是天意、坐使玉食無輝光、  
荒山乃爾飫佳品、安得驟褻置錦堂、君不見耒陵野  
老歌病橘、蕭蕭半死誠可傷、

得報以謫降官不許同處一州自鄂渚移居澧  
陽有感

萍漂梗泛又遷居、歎息謀身術已疎、願訪湘妃遺珮  
浦、試追漢傳弔纍書、干戈滿眼傷群盜、松梓連雲念



故廬澤畔行吟覺憔悴、前身疑是楚三閭

哭宗留守汝霖

宗澤字汝霖浙東人自爲小官卓犖不群能  
自立以故屢被罪靖康冬用爲磁守值金  
再犯關上以康邸奉使道磁澤力挽留不得  
行再造之功澤爲多同列者忌之譖毀百端  
斥外不用余去夏抵行在澤得守襄陽未行  
與語忠義慷慨憤發至流涕力薦於上使進  
職留守京師誅奸惡拊善良大得都人之心  
繕治城塹樓櫓復還壯觀屢出兵以挫賊鋒

以故能守數表請車駕宜還闕媚嫉者愈切  
齒難其代者故得不罷今聞疽發背而死殆  
憂憤使然殊可爲天下惜也詩云人之云亡  
邦國殄瘁方時危而失此一人其可哀也矣  
賦詩以哭之

時危念人傑、濟物須材雄、尋常齷齪姿、詎可收奇功、  
英英宗夫子、邈與古人同、抱器寔磊落、秉心鬱精忠、  
影纓仕州縣、山立不妄從、青松雖未高、已足凌蒿蓬、  
涉世多齟齬、失官久龍鍾、擢居河朔郡、煙塵正昏蒙、  
今上在藩邸、持節使虜中、力爭不可往、高牙建元戎、



王室遂再造、廊廟當壽庸、同朝共排娼、一麾江漢東、  
見我論世故、慷慨淚霑胸、薦之守留鑰、付以節制隆、  
惠政拊疲瘵、威聲懾奸兇、金湯治城塹、櫓樓歛以崇、  
出師京洛間、屢挫黠虜鋒、邦畿千里寧、誇說百歲翁、  
抗疏請還闕、北伐歸兩宮、辭直志颯亮、天子爲動容、  
奸諛更切齒、恨未能關弓、乃同歸鄴人、感憤殞厥躬、  
皇天不憖遺、吾道何其窮、驛驢竟委離、冀北群遂空、  
梁摧大厦傾、誰與扶穹窿、安能百身贖、坐爲四海恫、  
人亡國殄瘁、天意真懵懵、中原氣蕭瑟、洒涕臨西風、

宋李忠定公文集選卷之二十一

宋 邵武李 綱伯紀著

明 睨桐左光先羅生選

三山周之夔章甫訂

宗裔李嗣玄較正

詩 在湖外及  
謫海外作

自蒲圻臨湘趨岳陽道中作

鄂渚何嘗一日安、澧陽猶喜遠江干、帝妃降矣空遺  
佩、公子思兮欲採蘭、水帶瀟湘宜有雁、地連嶺蜀苦  
無寒、迂疎自咲謀身拙、却荷朝廷德意寬、



其二

屈身任道復何求、去國翻成汗漫遊、處世久、師齊物  
論、據懷聊賦畔牢愁、霜清日薄寒光急、雲慘天高陰  
氣浮、嫋嫋西風洞庭濶、可堪更上岳陽樓、

其三

歲寒又復事南征、桂楫蘭舟過洞庭、水入重湖千里  
白、山連平楚數峯青、雲鴻杳杳飛何遠、汀芷微微氣  
自馨、千古靈均英爽在、固應笑我學餘醒、

其四

不解揚波與鋪醢、又還來放楚江湄、椒蘭氣味何其

烈蘅蒨芬芳空爾爲、寧赴湘流非我事、託懷鵬鳥乃  
吾師、醉醒清濁初難共、漁父從來自不知、

其五

俎豆其如軍旅何、誰令瀚海起干戈、休將直道論三  
黜、且把微辭續九歌、山鬼含顰乘赤豹、湘靈解佩鼓  
雲和、蠻邦雖陋吾何恨、厭見旌旄相盪摩、

鼠鬚筆

中山毛穎久中書、鼠輩胡爲亦可俱、寢廟岩居真得  
計、畏人端恐擢其須、

深省軒在丈室之西余爲名之



軒檻虛明丈室西、叢筠佳木翠陰垂、遊觀物物皆深  
省、豈在聞鐘欲覺時、

見報以言者論六事其五皆靖康往故其一謂  
資叢士人上書以冀復用謫居海南震懼之餘  
斐然有作

力小安能勝萬鈞、退藏深渺欲全身、大恩不報有餘  
責、何必煩言浪指陳、

其二

非才自丐罷鈞衡、百念灰寒豈復萌、剛道資叢上書  
者、不知誰繼穎川生、

桂林道中

時危遠謫墮南蠻、猶在乾坤覆載間、瘴雨嵐煙殊氣  
候、玉簪羅帶巧溪山、枕椰葉暗傷心碧、擲燭花開滿  
目班、惟有月華依舊好、清輝應與照雲鬟、

山月驛聞子規次韻

春枕夢回孤館悄、世故縈心愁不了、山深夜聞子規  
啼、殘月滿窻天未曉、

道陽朔山水尤奇絕、舊傳爲天下第一非虛語  
也賦此

賦詩曾送謫仙人、番老翻遊到海濱、夢幻去來何日



了、且將病眼看嶙峋、

象州道中二首

路入春山春日長、穿林渡水意徜徉、溪環石笋橫舟  
小、風落林花撲馬香、山鳥不知興廢恨、嶺雲自覺去  
來忙、炎荒景物隨時好、何必深悲瘴癘鄉、

其二

竹屋茅簷三四家、土風漸覺異中華、碧榕枝弱還生  
柱、紅荔春深已着花、社燕不巢南候別、塞鴻無信北  
音賒、海山此去猶千里、會見安期棗似瓜、

伏讀三月六日內禪詔書及傳將士勝概慨王

室之艱危、憫生靈之塗炭、悼前策之不從、恨姦  
回之誤國、感憤有作、聊以述懷

憶昔廷爭駐驛時、孤忠欲挽六龍飛、萊公謾有親征  
策、亞父空求骸骨歸、靈武中興形勢便、江都巡幸士  
心違、累臣獨荷三朝眷、瘴海徒將血涕揮、

其二

胡騎長驅擾漢疆、廟堂高枕失隄防、關河自昔稱天  
府、淮海于今作戰場、退避固知非得計、威靈何以鎮  
殊方、中原夷狄相衰盛、聖哲從來只自彊、

其三



歎息姦臣術已疎、謀身誤國竟何如、馬嵬不進楊釗死、關陝初臨元振除、王室威靈嗟索寞、蒼生環堵未安居、荒陬不見中原事、望斷東吳一紙書、

其四

建炎基席待經綸、恩賜宸章寶墨新、學際天人何敢爾、忠開金石庶當仁、孔明得主規模壯、陸贄離朝謗譴頻、今日追思慙至意、御書重執淚盈巾、

含笑花

一去閩山遠、玉顏故人相遇有餘歡、臨風莞爾緣何事、應笑先生又失官、

其二

素○淡○丰○容○不○自○持○養○成○妙○質○亦○多○時○不○知○巧○倩○東○風○  
裏○含○蓄○清○香○欲○待○誰○

荔枝

絳○紗○囊○裏○水○晶○丸○偏○得○楊○妃○帶○笑○看○休○道○馬○嵬○當○日○  
事○只○今○何○處○是○長○安○

恭聞詔書褒悼陳少陽贈官與一子恩澤賜緡  
錢五十萬感涕二首

陳少陽名東惜公之去兩  
率諸生千餘人伏闕上書

乞留公而誅黃潛  
善遂爲潛善所害

哀○痛○綸○音○洒○帝○章○賜○金○贈○秩○事○非○常○無○心○聖○主○如○天○



地○著○意○姦○臣○極○虎○狼○忠○血○他○年○應○化○碧○英○魂○今○日○已○  
生○光○先○生○憤○懣○誠○昭○雪○九○死○南○遷○豈○自○傷○

其二

平○昔○初○無○半○面○交○危○言○幾○辨○益○寬○饒○幽○冥○我○已○慙○良○  
友○忠○憤○君○應○念○本○朝○故○國○遙○看○雲○杳○杳○新○阡○何○處○草○  
蕭○蕭○撫○孤○未○遂○山○濤○志○誰○繼○騷○人○賦○大○招○

次地角場、以瘡瘍不果、謁伏波廟、俾宗之攝祭、  
期以二十五日渡海、一卜即吉、夜半乘潮解桴、

星月燦然、平旦已達瓊管、東坡謂斯遊奇絕冠

平生、非虛語也、

宗之、公  
次子也

夜半乘潮雲海中、伏波肯借一帆風、滿天星月光鏖  
碎、匝海波濤氣象雄、大舶憑陵真潏潏、寸心感格在  
精忠、老坡去後何人繼、竒絕斯遊只我同、

南渡次瓊管、江山風景與海物不殊、民居皆庇  
檳榔木間、黎人出市交易、蠻衣椎髻、語音兜離、  
不可曉也、因詢萬安相去猶五百里、僻陋尤甚、  
黃茅中草屋二百餘家、資生之具一切無有、道  
由生黎山洞、往往剽劫、行者必自文昌縣泛海、  
得便風三日可達、艱難至此、不無慨然、賦此紀  
土風、志懷抱也、



四郡環黎母、窮愁最萬安、峒氓能憫寇、瀧吏豈欺韓、  
草屋藜簞裏、孤城瘴海端、民居纔百數、道里尚艱難、  
徑陸憂生蚤、乘風畏怒瀾、颶風能破膽、瘴氣必摧肝、  
去死垂垂近、資生物物殫、舶來方得米、牢罄或無餐、  
榼芋充嘉饌、蟲羸荐淺盤、萋藤茶更苦、淡水酒仍酸、  
黎戶花縵服、儒生椰子冠、檳榔資一醉、吉貝不知寒、  
何必從詹尹、無因咏考槃、失圖嗟罪大、得此荷恩寬、  
顧影同三友、談空不二觀、中州杳何在、猶共月團圓、  
次瓊管後三日忽奉德音恩許自便感涕之餘

賦詩見志二首

此身飄墮到滄溟、誰謂君王念賈生、黃紙再蒙題姓  
字、冊書特爲削刑名、山林老去何其幸、萍梗追思却  
自驚、天地恩寬難報德、試從今日數歸程、

其二

行年舊說似東坡、鯨海于今亦再過、僭耳三年時已  
久、瓊山十日幸尤多、却收老眼來觀國、尚冀中原早  
戢戈、病廢不堪當世用、感恩惟有涕滂沱、

北歸晝渡海風便波平尤覺奇絕

去得南風來北風、神靈只在指呼中、老坡有語舊曾  
記、信我人阨非天窮、



其二

來時風浪夜喧驚、歸去潮波枕席平、非是波神有分別、故教清晝看寰瀛、

雷廟讀丁晉公所作碑

巨卵曾因霹靂開、海邦從此得名雷、只應寇老曾遷此、作記何緣下令來、

謁寇忠愍祠

親征決策幸澶淵、南北歡盟有本源、丞相萊公功第一、猶將孤注作讒言、

立春日龍化道中得家問諸季已挈家渡浙江

如劍川又聞江西頗有群盜嘯聚遂決意由五  
羊趨循惠潮陽假道閩中以歸

川途奔走四回春海上經年與死濱子美自憐常作  
客長沮應笑是知津艱危至此無千古憂患如吾豈  
兩人往返循環真磨蟻已將大地等微塵

久不飲酒春日得家問喜甚與宗之對酌調馬  
驛中連飲數觥徑醉醉中和東坡醉題

飲少輒大醉醉中識其真天地一秋毫况此渺然身  
歸休岩穴間坐閱萬態新去去勿復道時清爲幸民  
寓瓊山遠華館一夕夢遊山間小堂松竹環合



有道士坐堂上誦李太白送人桃李園序中有  
良田名池竹果森然三十六洞別爲一天之語  
覺而異之今假道容惠當遊勾漏都嶠白石羅  
浮皆洞天也豈神者先告將有所遇耶賦詩以  
紀之

神清遠仙境、遊寂恣遐躡、羽人入我夢、軒戶藹松竹、  
高吟謫仙文、逸韻響金玉、覺來殘燈熒、懽悅猶在目、  
歸途歷容惠、問津非素卜、將遊四洞天、就彼白雲宿、  
豈無葛稚川、妙論資灌沃、試求龍虎丹、一使鬢毛綠、  
斯言倘可貞、長揖謝浮俗、却笑昌黎翁、強項寧詰曲、

荅鬱林郡守王君

山圍古郡碧周遭、陸續衣冠雅自褒、海上來歸懷麈尾、髮間空嘆長霜毛、易書顧我耽成癖、詩筆憐君老更豪、此去龍城幸非遠、不須巨石壓雲濤、

客有言長沙軍變向伯恭能彈治規畫甚偉適得伯恭書亦道其事作韻語寄之

向名子謹

長沙舞袖僅可旋、今作巨鎮湖湘邊、驕兵夜探赤白丸、乘間竊發將嘯翾、不知向子有老拳、縛束健卒秣數言、翩如鳥雀噲鷹鷂、姦胥覓領汙龍泉、彈壓一境敢復喧、稚耄鼓舞喜欲顛、歸哺其飴甘晏眠、衆服壯



略稱無前、我歸自南得之傳、頗欣祖生先著鞭、何不  
付與大將權、旌旗繽紛指雲燕、一鼓士氣如突煙、點  
虜破膽心少悛、洒掃海內清戈鋌、使我衰病安廬田、  
蕭懋德秀才自臨江遣人致書海上遇於歸途

賦詩寄之

踰年海上久安居、多謝蕭郎遠寄書、不向去來生一  
念、已將天地作吾廬、中州杳杳旌旗暗、暮景駸駸齒  
髮疎、準擬峽江成小隱、茅齋借我定何如、

罪謫海上中州親故罕、通問獨虞君、祖道相從  
湖海踰年比、歸同途次容南賦詩識別

飽經憂患莫如吾、暮景餘生寄一椽、獨子相從來瘴  
海、豈知還得共歸途、應觀天下奇男子、解笑人間淺  
丈夫、老去山林養衰病、好音時與繫飛鳬、  
許崧老聞虞君同泛海、以書語人曰、此天下奇男子也、因用其語、

宿都嶠山靈景寺

清晨遊棲真、薄暮宿靈景、山空桂花香、雲細泉石冷、  
高崖敞飛簷、象緯逼參井、惜無娟娟月、散此林下影、  
夜闌風露寒、岩岫燈火耿、疎鍾響嵌竇、客枕發深省、  
却隨猿鳥起、再上翠微頂、道人山後來、眸子頗清炯、  
試尋龍虎訣、妙意默已領、我生憂患餘、半世泛萍梗、



脫身鯨海中、掃跡方自昇、願從稚川遊、薪水事丹鼎、  
庶資刀圭力、少使棄榆朮、胡塵暗中原、靜謐惟五嶺、  
渺然炎荒南、自絕羽書警、結茅定前緣、幽夢先異境、  
上下三洞間、安得田二頃、攜家學龐公、捫蝨笑王猛、  
採薇與散髮、此志久已肯、嵇生非吾徒、幽憤醉方醒、

潯守李侯以所蓄法書十軸相示題卷末

承平文物何富哉、寶章萬笈藏蓬萊、餘篇散落士夫  
手、名筆徃徃牙籤排、連年胡騎擾河洛、錦標玉軸隨  
飛埃、李侯好事不忍棄、萬里艱棘携南來、炎荒相遇  
一笑粲、出以示我逾瓊瑰、歐虞顏柳邈已遠、蘭亭况

復昭陵埋、空遺妙蹟刻琬琰、不若故楮存煙煤、君謨  
近世稱第一、筆力與古肩相挨、醉翁功夫不在字、名  
望自足尊輿臺、芙蓉仙人有典則、滄浪逐客氣不衰、  
胸中磊落難屈折、故使心畫奇而環、東坡行書騁姿  
媚、山谷草聖窮縈迴、二公文翰照千古、俯視凡馬皆  
駑駘、米顛碌碌不足數、運筆尚有縱橫林、邇來非是  
無點畫、追時取好如俳諧、六書楷法雖小學、古人用  
意何其能、君看篆籀寫韻語、精巧豈容易追陪、今人  
萬事不如古、矧以豪墨爭雄魁、嗟予病廢臥都嶠、何  
止我馬云虺虺、感時撫事百憂集、對案不復能持盃、



明牕展卷慰岑坐、頓還舊觀雙眸開、梁谿書室插架處、念遠更覺增馳懷、世間雅好無出此、絕勝寶玩琴藏雷、于今此物未易得、願言十襲傳雲來、

清明日得家書四首

去國三年久、離家萬里餘、豈知戎馬際、仍得棣花書、金鼓振南國、松筠懷故廬、寰區端若此、天意竟何如、

其二

南荒炎瘴地、槐火又清明、海嶠無春色、江湖有戰聲、繫書來鴈足、歸思羨鵬程、欲挽天河水、滂沱洗甲兵、

其三

得歸歸未得、留滯繡江濱、感慨傷春望、僑居多北人、  
蒼生未蘇息、黃屋尚蒙塵、王室艱危極、潸然泣老臣、  
其四

煙嵐飛翠蓋、鯨海泛龍舟、退避亦已遠、憑陵殊未休、  
包胥思慟哭、曹劌願深謀、歎息繞朝策、何人知 侯、

三月二十三日德音至南容恭聞駐蹕浙東王  
師屢捷虜騎遠遁是日得諸季書挈家寓饒之  
德興幸免驚擾欣忭之餘輒成口號

紫泥黃耳到同時、家國無虞慰所思、飲馬胡雛歸朔  
漠、安巢越鳥返南枝、休祥允協靈基卜、喜事何因乾



鵲知、便可理裝尋去路、攜家深赴鹿門期、

四月六日離容南陸行趨藤山路崎嶇然夾道  
皆松陰山崦田家景物類閩中殊可喜也賦古

風一篇

孟夏草木長、清陰散扶疎、葱蘢竹樹間、石磴蟠縈紆、  
嗟我事行役、彌年困征途、及茲理歸鞍、敢復論崎嶇、  
深谷四無景、高岩倚天衢、稍從平川行、遂得田家居、  
籬落靜窈窕、桑麻鬱紛敷、新秧綠映水、雞犬鳴相呼、  
中原暗鋒鏑、胡馬恣長驅、此豈桃花源、幽深了如無、  
逝將適閩嶺、買田自耕耬、結廬亂山中、聊以全妻孥、

江行卽事

一重一掩翠參差、路入桃源客意迷、江霧曉分山遠  
近、浦鷗閑送櫂東西、頗欣嶺表佳泉石、聞道江南多  
鼓輦、稚子候門應念我、提攜來共此幽棲、

自晉康順流六十里有山巉然臨江下有岩洞  
可容千人軒豁平坦景極幽邃石罅間滴泉厥  
味甘冽因目之曰玉乳岩賦詩以紀其事

鼓施下端溪停橈登巖嶺呀然岩洞開儼若棟宇設  
千夫可環揖故步凹凸玲瓏四壁間一一幢旒列  
誰令胚渾初凝結有罅缺當年補天手不顧山石裂



鐫鑱餘舊痕、瑣碎委環玦、五峯近龍淵、無乃通貝闕、  
試求玉函書、何異探禹穴、涓涓乳泉滴、璨璨冰玉潔、  
清聲落嵌竇、自中琴筑節、賞之味甘芳、滌我肺腑熱、  
瓊漿笑裴航、石髓謝王烈、嶠南瘴癘鄉、有此雲腴冽、  
青葱松桂陰、景物助幽絕、豈無會心人、來遊共旌別、  
題詩製佳名、聊以紀歲月、碧落耿相望、千里未磨滅、

### 江晚

清江一曲深、翠岫千峯峙、江村八九家、茅舍修竹裏、  
沙頭漁網懸、林表素煙起、安得惠崇師、寫此真山水、

江風蕭蕭江水清、飛蚊撲撲何處生、駝肩豹脚嘴如  
鐵、天使啞食同蠅蟲、先生暑困汗翻雨、僮僕搖扇疲  
屢更、乘虛投隙肆毒吻、鼓翅舞足何其輕、湏臾桃含  
變柳絮、坐使饑腹成膨脝、捨身施汝吾豈惜、逼耳最  
惡聲、嬌獐有時緣拊汗、吾指罪雖應爾心則矜、露華  
清泚自可飲、戒汝慎勿貪芳腥、

### 端石硯

端溪出硯林、最貴下巖石、珍物乃卵生、孕此馬肝色、  
世尚鸚鵡眼、通透蓋石脉、我來巖中遊、竒探偶有獲、  
溫然若片玉、秀潤不滿尺、斲成蛟龍池、澁滑宜筆墨、



嘗觀管城子、沐髮散簡策、嗟予好陶泓、收拾積珪璧、  
得此餘可忘、一生看幾屐、

望白水山次合江樓韻

羅浮之麓何壯哉、山靈爲我煙雲開、匆匆行役不一  
到、翠光百里隨人來、嶠南鍾此山川美、中有幽人呼  
不起、月圓月缺豈人爲、潮落潮生自江水、非人流水  
水流人、世故人情日日新、撥置千憂并百慮、且醉一  
斛松醪春、

泛舟循惠間山水清絕口號三首

雨過溪流沒舊灘、舟行竟日畫圖間、重重翠綠相環

揖臥看王維著色山

其二

煙雨霏霏溪上村、白沙翠竹對柴門、江湖戰鬪波成血、耕鑿樵漁如不聞

其三

山下清江匹練橫、山頭紅日半輪明、漁人晚集知多少、靜聽鳴榔撒網聲

夜霽天象明潤、仰觀有感成一百韻、時歲在斗熒惑在氐微、甚辰鎮陵犯於翼軫、間夜半斗杓轉占帝座、未明台星尚拆云



昊穹運宸極、示人文粲然、萬象森布列、七曜紛廻環、  
體物具六擾、面朝別三垣、德隆乃循軌、政錯因失纏、  
日月有薄蝕、星辰或相撓、暈適與佩玦、精稜光屬聯、  
災祥本人致、銷弭術在焉、譬猶五藏病、察色推其原、  
詎有使之者、一氣兆所先、應病投藥石、厥疾尚可痊、  
恬不加料理、瞋眩知何緣、愈病當以藥、弭災當以言、  
苦言逆人耳、龜筮窮根源、甘言悅人心、無乃有後艱、  
虛心行正說、天道咫尺間、太戊正厥事、桑穀反爲妍、  
宋景知愛民、法星退亦遄、精誠所感格、應效猶權衡、  
堯舜曰欽若、七政齊璣璇、周公戒成王、敬德享歷年、

柰何後世士、導使不畏天、爲子傲厥老、獲罪安禱旒、  
議論輦熨豐、猷爲終政宣、皇天豈無意、儆戒良拳拳、  
長星踰萬丈、赤氣夜繽紛、是爲兵革祥、厥異古未聞、  
臺諫旣鉗舌、太史亦諱論、事始初破陸、釁成繼開燕、  
至今爲厲階、禍難相連延、迨于靖康初、儲皇御乾坤、  
胡雛遽犯順、鐵騎凌天閭、雖含恭儉姿、顧乏英偉臣、  
邪正相雜揉、盈庭事紛紜、機會一朝失、安危自茲分、  
愚懦不遠慮、賊退已安眠、豈無繞朝策、誰着祖生鞭、  
慧孛掃紫微、急怒如戈鋌、諛臣秘其事、猶欲歸以文、  
踰月始避殿、何以應乎乾、黠虜再稱兵、東都滿旌旛、



金湯失險固、豺虎肆噬吞、八駿狩沙漠、神州遂崩奔、  
坐令鴟梟徒、盜據黃屋尊、上帝眷明德、中興屬吾君、  
建炎繼大統、威令赫以新、四海望膏澤、攘戎拯斯民、  
光明日初出、照燭窮天淵、陰雲忽蔽塞、寰宇陡蒙昏、  
迄今四寒暑、天變何其繁、日中有黑子、翩若燕雀翻、  
赤氛環斗樞、黑稜如炎煙、三台日離析、帝座亦屢遷、  
連年盛夏寒、雨霖日聯綿、昨霄偶晴霽、仰視青霄端、  
五緯失纏次、熒惑僅如錢、太白揚其輝、辰鎮光相駢、  
災變不虛發、天心尚周旋、岌然國勢蹙、人謀亦迴遄、  
飄騰虜騎橫、搏逐如鷹鷂、前年蹂關陝、殺氣摩東川、

去年破山東、輕騎犯淮壩、今年擾江湖、深寇台與溫、  
東南幾藩府、接境遭劉虔、將帥望風遁、巨賊摩其肩、  
屠戮到稚乳、焚燒無尺椽、翠華亦飄蕩、泛海御樓船、  
士卒頗攜貳、誰與守四邊、內變不能弭、何以禦外患、  
哀哉蒸黎心、戴宋何其堅、肝腦塗草野、終不負國恩、  
乃知祖宗德、滲漉深淵泉、如何廊廟謀、畧不加矜憐、  
堂堂藝祖業、揮斥極八埏、誰陳退避策、一一欲棄捐、  
兒戲失兩河、甘心喪中原、雖爲東南行、初不治籬籬、  
東晉有江左、保守百餘年、問誰居腹心、王導與謝安、  
強藩總重兵、控扼摧兇姦、坐待天下定、此理恐太漫、



胡不法光武奮起由空拳勞身馬上治介冑被霑汗  
履危救民死國祚仍復傳正如大厦傾扶持極艱難  
一日葺一日舊業倘可全畧不事撐拄摧壓何由完  
厥今誰股肱前轍或未悛尚容狐鼠輩寢廟恣穴穿  
但爲一身謀真若蟻慕羶風雨正凌暴不顧棟宇顛  
宵人何其危范子何其賢嗟我素愚拙三朝荷陶甄  
愧無徙薪策徒有焦頭愆罪大幸不死歸途極涸涔  
廢食念宗社傷心痛元元不知狂言發感憤成此篇  
何當採詩人爲致冤旒前雖磨斧鉞誅瞋目無所寬  
史鱣以尸諫一語不敢煩君臣重修德庶可迴蒼圓

早行

晨起戒徒御、小村扉未開、霧分山遠近、溪繞路縈回、  
排遣憑詩句、銷除賴酒杯、大恩何以報、海上得歸來、  
通衢驛夜坐有感

永夜發孤笑、起看河漢流、群山湧翠浪、纖月掛瓊鉤、  
豈謂艱難日、翻成汗漫遊、虛舟今不繫、暮景付滄洲、



2

一

宋李忠公文集選卷之二十二

詩

北還道中及抵泰寧復避地長樂作

循梅道中遣人如江南走筆寄諸季


海外歸來客、天涯老病身、卷開愁細字、冠側倩傍人、  
久矣鴛鸞絕、優哉麋鹿親、尤堪澆美酒、醉裏發天真、

其二

人傳吳會破、虜向福山歸、松梓定安穩、池臺今是非、  
傷心懷故老、流淚落征衣、目斷滄波上、龍舟翠蓋飛、

其三

虜騎滋南牧、于今大將誰、樓船泛溟渤、哀詔問瘡痍、





沙漠深鑿輅、江湖震鼓輦、遠方惟嶺嶠、耕鑿自熨熨、  
其四

觸熱冒氛藹、懷家思弟昆、早行青嶂月、夜泊綠林林、  
且喜江南近、休將塞北論、憑高望吳越、黯黯更銷魂、

宿興寧縣驛二首

清夜風露冷、月華窓半侵、懷家千里夢、許國一生心、  
倦鳥投林急、潛魚泳澤深、無人知此意、抱膝自長吟、

其二

六月欲徂暑、又催流火輝、竹間螢已亂、簷側燕將歸、  
豈念棄紈扇、未懷勞鐵衣、兵戈猶未息、老盡故山薇、

次韻申伯見贈

連年奔走厭艱難、痛憤胡雛入漢關、萬里自忘鯨海  
遠、一身今伴嶺雲閑、孤忠耿耿空餘志、華髮蕭蕭已  
映顏、慙愧故人相勞苦、去時明月却同還、

送季言弟還錫山省先壟

季言名綸公行狀綸所撰也

胡雛南牧浙河空、多幸依然馬鬣封、勞汝遙傳一掬  
淚、霜前爲灑萬株松、

其二

每憂吳會太繁雄、虜騎憑陵掌股中、若到新經兵火  
地、莫將有限悼無窮、



其三

連年瘴海鬢邊絲、多荷君恩特放歸、邂逅故人相問訊、爲言遽瑗久知非、

冬至後四日修供羅漢巖因訪丹霞本老成二

絕句

籃輿清曉叩禪扉、山路雲深翠濕衣、誰使峯頭雙練瀑、空濛散作玉花飛、

其二

碧山深處敞層巖、中有幽人默自參、休指天雲與磤水、煩師試說後三三、

上元日同王豐甫葉夢授會飲

當年玉輦侍端門、豈意風塵四海奔、正恐溪山大寥落、也將燈火照黃昏、月華清切人千里、曲調淒涼酒一樽、多謝故人相煖熱、感時撫事祗銷魂、

聞建寇逼境携家由將樂沙縣以如劔浦

我來寓杉江、客館未煖席、紛然群盜起、環境暗鋒鏑、束裝呼僕夫、又復事遠適、戔戔章源嶺、峻峭初未識、攀援僅能進、十步九傾側、風吹霧雨冰、草木盡矛戟、朝登暮始降、落日半天赤、兒僮饑屢啼、徒御疲已極、薄遊玉華洞、庶可稍休息、東郊遽不開、蜂蟻迭吞食、



避寇如避弩、吾敢憚行役、驅車適沙陽、頗喜田野闢、  
雖經兵火餘、邑屋幸如昔、舊遊疑夢中、一一有遺跡、  
寓軒存佛宮、修竹自春色、崢嶸凝翠閣、尚對七峯碧、  
故人皆避地、誰與道胸臆、理舟劒浦行、稍就寬曠域、  
溪流正湍暴、惡子亦充斥、脫身險阻中、協濟藉衆力、  
吟哦杜陵詩、妙語皆中的、喪亂古今同、臨風意如織、

次沙陽留題寓軒

一紀重來一夢中、寓軒修竹自春風、故人散去因群  
盜、舊意相親惟七峯、溪上偶存凝翠閣、園中安往樂  
全翁、感時不用頻惆悵、萬法從來總是空、

留題凝翠閣二絕

重到沙陽十二春、新罹兵火爲傷神、欲論舊事無知者、只有溪山是故人、

其二

山秀波平望不窮、此身渾墮翠華中、兵戈滿眼棲何地、注目溪頭群玉峯、

追次東坡和鬱林王守韻

蓋世文章妙語言、誰令骨相似虞翻、玉堂大手空遺跡、海島幽棲有斷垣、仙去公寧懷此土、生還我亦荷寬恩、龍蛇滿紙疑飛動、尚想揮毫氣象軒、



次韻周元仲見寄

五年奔走敝征衣、海上相親半是黎、望斷故園無旅  
雁、心驚中夜聽荒鷄、豈知南渡能還北、更咲東來又  
向西、多謝故人尋訪意、千山萬水不曾迷、

遊鼓山靈源洞次周元仲韻

碧海吸長江、清波逾練淨、我爲鼓山遊、潮客初放艇、  
連峯翠崔嵬、倒影涵玉鏡、捨舟訪招提、木末繚危磴、  
凌雲開寶閣、震谷韻幽磬、乃知大叢林、棲託必深壘、  
靈源更環竒、巖壑相隱映、森羅盡尤物、無乃大兼并、  
偉哉造化力、至巧於此罄、煙雲互卷舒、變態初不定、

豈惟冠一方、寔最東南勝、周行洞峽中、泉石若奔競、  
飄蕭毛髮清、滌濯肺腑瑩、當年喝水人、端恐溷觀聽、  
是心如虛空、動寂豈妨並、兵戈正聯綿、幽討亦云幸、  
相攜得佳侶、散策謝軒乘、媿安朝夕間、未可笑趙孟、  
淹留遂忘歸、悵望海天暝、不負惠詢期、更起滄洲興、  
季夏之初、自安國遷南臺、天寧寺依南山而面  
北、暑氣尤甚、暇日望山頂松林鬱然、意必有異、  
因穴垣鑿磴以造其上、形勢坦平、風日清美、四  
顧山巒環合、江潮往來、景物不可模狀、月出林  
表、清光更多、夜久聞寥、殆非塵世作古詩二十



韻以紀其事奉呈巽達元仲

旅泊不求安、小憇南臺宮、軒楹盡比鄉、盛暑墮甌中、  
開垣追微涼、山頂羅千松、煩襟忽破散、濯此萬里風、  
群山通環繞、雲物增奇峯、江潮信有期、來去初不窮、  
嘯詠得所托、幽禽亦玲瓏、青霞蔽落日、皦月生於東、  
清光入疎林、照我髮髮鬆、壯年幾何時、倏忽成衰翁、  
願餐日月華、爲駐冰雪容、二子皆靜者、翛然此相從、  
靈丹論祕訣、妙理談真空、兵戈滿寰瀛、此樂豈易逢、  
猶恨邇城市、時來車馬蹤、逝將選幽僻、誅茅寄蒙籠、  
灌溉荔校園、可敵萬戶封、屋前修竹合、屋後溪流通、

風月應更好、清歡未相同、稚川晚聞道、尚冀刀圭功、  
秋日奉陪王豐甫許子太康平仲遊賢沙宿鳳  
池登昇山偶成

追陪杖屨極幽尋、共宿精廬上翠岑、鳳鳥不來空碧  
沼、仙人已去得黃金、月林散影壘瑤碎、煙水澄光組  
練深、欲把詩篇與收拾、登臨誰會此時心、

以舊賜戰袍等贈韓少師二首

并序

某靖康丙午春、以尚書右丞充親征行營使、  
時少師韓公寔隸麾下、每嘉其有忠勇邁往  
之氣、建炎丁未夏、蒙恩詔除右僕射、赴行在、



所少帥迂于睢陽遠郊、戈甲旌旗、輝映道左、  
迨今六年、某以罪戾憂患之餘、臥疾江海、少  
師被命宣撫閩部、相見有故人戀戀之意、旣  
而躬率將士、克復建城、討蕩群寇、一方寧謐、  
奏功凱旋、將復言別、隨行有舊賜緊絲戰袍、  
鏤裝松文劍、鍍金銀纏筭鎗、金花團牌、山林  
病夫、無所用之、輒以爲贈、願持此爲聖主折  
衝禦侮、討叛敵愾、建中興之功、使衰病者增  
氣、不其翹歟、賦詩二章、以識別、且見意云、紹  
興壬子仲春晦、具官某序、

胡騎當年犯帝闈、腐儒謬使護諸軍、尚方寶劍頻磨  
賜、御府戎衣幸見分、丈八蛇矛金纏筴、團欒獸盾繪  
成文、山林衰病渾無用、持贈君侯立大勲、

其二

舊欽忠勇貫三軍、每一相逢更絕倫、鐵馬金戈睢水  
上、碧油紅旆海山濱、氣吞勅敵唐英衛、力破群兇漢  
禹恂、聖主中興賴良將、好陪休運上麒麟、

蒙恩除荆湖廣南宣撫兼知潭州具奏辭免

宣撫

荆湖及罷歸長樂并  
制置江西及歸後作

昔年宣撫兩河間、行次覃懷已召還、壯志久拚身似



葉巧言終使罪如山、士風欺蔽猶前日、君命堅辭秬  
厚顏、回首追思七年事、孤危易感涕空潛、

五月六日率師離長樂乘舟如水口

力疾驅馳爲主恩、敢辭炎暑道途勤、五更鼓角催行  
色、百里旌旗拂曉雲、閩粵乍開新幕府、灞陵初起舊  
將軍、江山滿目難留戀、試擁彫戈靖楚氛、

次昭武省祖塋焚黃因會宗族二首

不到鄉閭二十秋、幸因帝命得來遊、過家上壘懷先  
德、醺酒揮金學故侯、季子歸來饒印綬、魏舒起廢擁  
貔貅、自嗟慷慨據鞍客、不及當年馬少游、

其二

兵火燒殘井邑空、溪山依舊夕陽中、故鄉自昔悲游  
子、壯歲歸來今老翁、細認里閭尋樹石、怪看旌旆走  
兒童、王師新定回源盜、猶喜田家歲事豐、

八月十一日次茶陵縣入界湖南有感

憶昔湖南全盛日、郡邑鄉村盡充寔、連年兵火人煙  
希、田野荆榛氣蕭瑟、我初入境重傷懷、空有山川照  
旌節、試將耆老細詢問、未語吞聲已先咽、自從虜騎  
犯長沙、巨寇如麻恣馳突、殺人不異犬與羊、至今澗  
谷猶流血、盜賊縱橫尚可避、官吏貪殘不可說、挾威



倚勢甚豺狼、刻削誅求到毫髮、父子妻孥不相保、何  
止饑膚困鞭撻、上戶逃移下戶死、人口凋零十無八、  
九重深遠那得知、使者寬容失譏察、今朝幸覩漢官  
儀、願使斯民再蘇活、我聞此語心如摧、平生况有陽  
城拙、行移州縣遣官僚、盡罷科須治姦猾、巨蠹推窮  
付囹圄、社鼠城狐掃巢穴、削平群盜拊瘡痍、報政何  
須待朞月、祖宗德澤感人深、周漢正賴宣光哲、中興  
之運期有在、庶以消微助溟渤、少陵酷愛春陵行、千  
古知心有元結、

次衡州

美兵赤子滿潢池、渤海龔生真吏師、欲識循良買牛  
犢、會須哀痛向瘡痍、東南王氣雖方振、西北流人自  
可悲、七萬虎狼皆歛戢、廟堂還有阿誰知、曹成以七萬衆聽韓

世忠招安自衡州趨江西公  
彈壓出境成歛戢不敢犯

馬友餘黨步諒等以二萬衆自江西寇湖南破  
醴陵攸縣屯於衡山縣界得報卽走衡陽率師  
次衡山遣兵將夜渡江晨叩其壘賊出不意悉  
解以降放散驅擄老弱外得精兵七千人分隸  
諸將謾成口號

赤眉銅馬與黃巾、漢魏收功豈異人、駕馭撫綏要有



術從來盜賊本王臣

初入潭州

昔年假道過長沙、煙雨濛濛十萬家、棟宇只今皆瓦礫、生靈多少委泥沙、寸心報國渾忘老、四路宣風靜不譁、祇願吾皇假年月、直從襄漢定中華、

余行次衡陽、彈壓曹成七萬餘人出湖南境、移師衡山、降步諒二萬衆、旣入長沙、次日卽遣師降王進三千人於湘鄉縣、七星寨復破王俊三千餘人於邵州、其餘群盜以次討定、凡五萬餘、選擇精銳得萬二千人、分隸諸將境內、遂安流

移歸業亟上章復丐宮祠未報聞聞有旨廢宣撫司及以言者罷去有感

起廢無因許退藏、報恩欲效短中長、固知吉甫無張仲、猶冀文侯知樂羊、破賊功名嗟寂寞、吞燕志氣已淒涼、春鴻秋燕空來往、昭氏成虧可兩忘、

其二

大將呼來若小兒、片言罷去復何疑、才如頗牧猶遭譖、功似韓彭未免危、往事幾番萋菲織、孤忠惟賴聖明知、歸歟又得山林趣、丹荔青蕉正是時、

長沙有長江重湖之險而無戰艦水軍余得唐



嗣曹王臯遺制創造戰艦數十艘上下三層挾  
以車輪鼓蹈而前駛於陣馬募水軍三千人日  
夕教習以二月十八日臨清湘門按閱旌旗戈  
甲一新觀者如堵成五絕句以誌之

車船新製得前規、鼓蹈雙輪勢似飛、創物從來因智  
者、世間何事不由機、

其二

戰艦初成閱水軍、旌旗戈甲照湘濱、潭人未識舟師  
製、歎息工夫若鬼神、

其三

長江巨浸雖天設、控制隄防本在人、暇日不爲堅守、  
計臨危何以扼通津、

其四

曹瞞百萬瞰江濱、誰遣孫郎會解紛、滿眼旌旛風浪、  
裏、景升方覺是鷄豚、

其五

劉裕當年西入關、樓船浮渭取長安、不施艣櫂爭先、  
進、坐使秦人破膽看、

初去長沙有感

恭承嘉惠半年余、千里宣風愧術疎、豈有恩威思將、



士謾勞稚耄擁輪輿、魚歸江海身方適、鳥出樊籠意  
已舒、多謝吏民相眷戀、使君此去欲懸車、

自長沙至醴陵道中田皆懇闢道傍有築室而  
居者

年來盜賊若冰銷、襁負歸民滿四郊、煙雨一犁初破  
土、江村環堵且謀茅、瘡痍不擾生新肉、燕雀無虞逐  
舊巢、安集勤斯徒自歎、勿令虎兕更咆哮、

自水口泛舟如長樂

行盡青山泛碧溪、潮平波穩畫船移、春鴻秋鷁非人  
力、明月清風長我隨、萬事糾紛何日了、一生襟抱有

誰知落帆已到釣臺側、恰似南柯夢覺時、

周元仲來自湖外傳示崧老贈東林珪三友篇  
讀之慨然因次其韻

粲粲襄陵翁、太嶽幾世孫、文章老益奇、于道見本源、  
我生值艱難、慘淡風霾昏、挽翁共出力、一廓扶桑暉、  
芬馥藝蘭芷、神奸伐蛟鼉、此志竟蕭條、相顧聲爲吞、  
遠遊負深轡、行遍西南坤、憶昨遇江上、攜手廬山樊、  
林間接款語、窮盡興衰根、三年隔瘴海、豈謂我尚存、  
何嘗知棗梨、頗亦聞風旛、讀翁三友篇、雅氣久彌敦、  
江南盜雲擾、崛起巢與溫、翁今渺安在、猶滯修水源、



我病寄閩嶺、棲息僧家園、百念悉灰冷、窺見易象渾、  
區區不自量、信筆箋微言、逝將從翁遊、淬礪刪其繁、  
三聖邈已遠、萬古同所尊、何當進此道、對坐虛明軒、

附許崧老三友篇

平生我三友、四海吳李孫、抱能不時施、戎馬坐中  
原、孫旣北隨難、落日胡塵昏、吳亦南投荒、蠻瘴愁  
朝暾、李今又去我、浮槎雜鼃鼃、浮槎渺何極、海天  
相吐吞、蘧蘧遺此老、死生信乾坤、顛沛吳江渚、投  
衣楚山樊、修水抱蒼嶺、劒氣埋雲根、翛然竹林下  
乃有幽人存、神交跡兩忘、高風嫋孤籬、慰我念友

心方外得所敦、空寂湛禪悅、中有詩酒溫、我亦忘  
世者、早窺治亂原、忠臣泣廟社、志士傷丘園、方持  
一寸膠、徃澄九河渾、晚知未得久、緡經委空言、迨  
比從君遊、始脫百憂繁、五君與六逸、歲久名方尊  
他日竹庵東、更開支許軒、孫與吳李爲三友且  
死難而名不傳惜哉

西軒小池荷花盛開與賓客酌酒其上以荷爲

杯引滿徑醉

池上荷花一夜開、呼賓小酌共徘徊、試將曲柄黃金  
杓、注此虛心碧玉杯、風露暗隨香氣入、雲山盡向坐  
隅來、頽然徑醉君知否、不醉須爲造化吟、



詠懷

衰年萬事懶、此志有誰知、偶爾出何意、泛然歸不遲、  
休爲鵬鳥賦、幸及荔枝時、水石日在眼、旌旻非所思、  
攜琴傍松徑、置酒俯蓮池、粲粲水花淨、蕭蕭風葉披、  
忘言聊隱几、得趣剩圍碁、天地慘將暮、風雲徒爾爲、  
物華去苒苒、草色自離離、密勿猿鶴侶、迢遙丘壑姿、  
親朋有情話、圖史皆吾師、掃室僅容膝、說詩真解頤、  
多慙鵷鷺羽、且詠鵲鷦詩、逸少誓獨苦、孔君休乃宜、  
平生滄海約、歲晚鹿門期、喜近清秋節、那爲宋玉悲、  
諸季招客遊東山、置酒賦詩以病不果往次其

韻

衰病年來百事闌、禪居環繞盡青山、登高選勝從君  
樂、隱几忘言輸我閑、一枕清風銷永日、三盃濁酒發  
酡顏、雀羅可設從來事、東閣常閑不是慳、

送李似之舍人歸連江舊隱

羨君卜築粵江濱、去作林間適意人、環揖溪山供勝  
賞、賸栽桃李占芳春、養生有主身長健、與物無心道  
轉親、一曲鑑湖歸賀老、可能分半乞比隣、

題唐氏所藏崔白畫雪中山水

我昔曾爲陽羨遊、正值雪花大如掌、開門恍訝天地



白雲湧群山入書幌、銅官遠並玉峯寒、罨畫暗流水  
片響、千巖萬壑爭出奇、應接高低迷俯仰、十年不到  
浙江西、寤寐勝遊勞夢想、大梁崔白豈善幻、斷取山  
川移異壤、當時眼界無盡觀、都在一幅生綃上、南方  
炎熱瘴癘地、使我脩然毛骨爽、天光慘淡陰氣濃、片  
片飛花來蒼莽、毫端造化成大出、不比餘工得其髣  
連峯合沓波濤翻、負雪崔巍幾千丈、幽谷草木枝幹  
老、巖曲樓臺簷角敞、溪頭水落正石出、暮靄沉舟暗  
漁網、山牆野壁茅屋深、風颺青帘如五兩、買魚酌酒  
者誰子、應有幽人坐同饗、平生愛雪喜山水、對此乍

覺精神悅、明慙靜看久、愈妍似倩、麻姑爲爬痒、一時  
名手真絕藝、妙處工夫誰與賞、生前裘馬頗蕭條、身  
後丹青空倜儻、惠崇聲價亦相先、滕薛未知當孰長、  
我家梁谿富溪山、雪裡寒光含萬象、每同子猷乘小  
艇、不數王恭披素氈、故山猿鶴會相思、感物興懷增  
勇往、時平事定歸去來、安得飛翰出塵鞅、

與叔易奕不勝賦著色山水詩一篇

將軍思訓久爲土、龍眠道人亦已亡、誰將丹青寫山  
水、入我宴坐虛明牕、峯巒廻複吐雲氣、林木窈窕籠  
煙光、丹楓半落天雨霜、漁舟招搖靜鳴榔、野橋巖寺



遙隱見、浦花汀草何微茫、江邊落日尚返照、山頭正  
作金色黃、縈青繚白有餘態、却笑水墨無文章、畫工  
畫意不畫物、咫尺應須千里長、具區約畧茗雪赤、  
芹髣髴通瀟湘、安得仙翁一葉艇、使我超忽窮江鄉、  
題劉仲高提刑所藏文與可墨竹

蕭郎畫竹稱逼真、與可所作尤絕倫、不將丹青借粉  
飾、直把寶墨傳精神、渭川萬箇在胸次、援毫戲掃如  
煙雲、眼前先見欲畫者、兔起鶻落氣益振、稚枯偃仰  
盡變態、筆力幹轉風霆吞、平生知作幾千幅、得心應  
手老斲輪、當時誰是識畫者、東坡謫仙蓋其人、老坡

亦善作此畫、意雖已到法未親、是中妙處不傳授、但  
得木石枯鱗皴、自從兵火喪亂後、錦囊玉軸隨埃塵、  
公於何處得此本、四枝墨色猶鮮新、風梢雨葉間濃  
淡、紛披屈折節脉勻、置之座右滌炎暑、颯颯便覺秋  
聲聞、子猷會見定絕倒、安用日事栽培勤、只今與可  
骨已朽、妙蹟散落此幸存、願公秘惜勿輕示、更築小  
堂名墨君、

庭中酴醾盛開二甥以詩來戲和其韻

栽培初不棄葑菲、桃李無言下自蹊、試營小圃供幽  
奇、野趣獨與閑相宜、邇來綠葉子滿枝、新花粲發歸



醪醑漾漾、煙雨濕冰姿、湯泉乍洗溫柔肌、玉人胡爲  
在軒墀、態濃意遠、芬蘭芝、月華萬里來清輝、照耀光  
彩通屏帷、青雲宛轉蟠素螭、高架上與飛鼉齊、客來  
花下同圍碁、對花不怕輸吟詩、帝鄉富貴未可幾、淵  
明之語真良規、一杯相屬慎勿辭、我方鋪糟啜其醅、  
醉中不省今何時、胸次洞達元無疵、山林正好相娛  
嬉、

送錢申伯如邵武

錢郎與世苦不諧、胸次徒抱經綸才、行年五十猶未  
試、蟠螭雖久愆風雷、掃除冒氣趣空寂、華藏重重恣

遊歷世間幻妄此道真未必亨通勝窮阨我方臥病  
南海濱喜君襟抱時相親胡爲乘興有所適使我悵  
望歸飛雲兵戈格鬪何時息田園將蕪歸未得同是  
天涯流落人此心炯炯君應識閩山六月丹荔枝火  
齊堆盞侑一卮願言及此復過我歲晚勿負滄洲期  
醉鄉我已成真隱君亦逃禪學蘇晉樂天不醉卽談  
禪此外悠悠直湏忍

茅齋成乾元珪老以拄杖施牛拂見遺

橫挑世界鴻毛舉旋打虛空冰片銷今日拈來居士  
手穿雲渡水且逍遙



次韻李似宗見示小圃之作二首

山林自與性相宜、卜築何須物物奇、旋剪荆榛開小徑、自移松菊趣佳時、雲生北嶺難持寄、月出東山有所思、歲晚龐翁更多病、攜家直赴鹿門期、

其二

竹影桐陰夏日長、水花晚色淨林塘、招邀風月成三友、邂逅賓朋共一觴、閑把琴書聊自樂、靜看蜂蝶爲誰忙、年來百念皆灰冷、願老鰥川雲水鄉、

殘臘雪再作二首

朔風三日散輕埃、珠蓋瓊花一夜開、灝氣遠從雲表

下、清聲初自竹間來、未論上瑞呈三白、且助元功澤  
九垓、向晚城樓聊寓目、西山千疊玉崔嵬、

其二

縈回作舞下煌霄、滿地光鋹混凸凹、虛幌夜寒疑月  
彩、疎林晚粲誤梅梢、遠懷戴隱終須訪、高擁袁門未  
易敲、好是碧天雲散後、銀蟾瞰潔兩相交、

再次前韻

太清真境絕氛埃、十二瑤臺面面開、戰退玉龍鱗甲  
冷、導迎仙鶴羽儀來、祥編已慶占盈尺、和氣行欣浹  
九垓、湏信天公工幻戲、晴山依舊翠崔嵬、



趙都漕出示魯直少游所書梅詩次韻

冰霰憑陵群木槁、只有梅花欺不倒、籬邊野外忽嫣然、暗香解作幽人惱、化工著意爲尤物、故遣孤芳得春早、道人寫照三昧手、不假丹青更妍好、詩家也是可憐人、落筆雲煙隨意掃、遂令淡墨勝鉛華、紙上一枝長不老、庭中幾樹正垂垂、忍看飄零委煙草、會須痛飲對繁華、細把根源問蒼昊、

冬日來觀鼓山新閣偶成古風

尋盟訪鼓山、風物宛如昨、山中有開士、彈指成傑閣、應真飛錫來、一一得所託、翬飛騫棟甍、絢爛麗丹雘、



峩峩大頂峯、孤影入簷角、乃知象教力、建立必卓犖、  
却爲靈源遊、雲木互參錯、岩深松桂香、石古苔蘚剥、  
冬溫日清美、景短氣蕭索、天然資野逸、安月遮翠幙、  
快哉緬登臨、及此小搖落、乘高望瀛海、南極露浪濤、  
蓬壺在跬步、誰謂仙山邈、蒼茫杳靄中、萬象恣磅礴、  
迴頭睇中原、郡國半沙漠、犬羊汚宮殿、蛇豕穴城郭、  
疇能挽天河、一洗氛祲惡、我生多艱危、久矣衰病作、  
君恩聽言歸、養拙侶猿鶴、忽忽歲適盡、平子殊不樂、  
幸同二三子、杖屨徧丘壑、躋攀力尚強、談心無愧怍、  
野鹿飽豐甘、冥鴻在寥廓、翻思軒冕間、何異遭束縛、



斯遊信清絕、妙賞寄寂寞、晚來淒以風、遠色秀增岳、  
泠泠鍾磬聲、隨月度林薄、怒焉感時心、未免如隕籥、  
倘能駕雲螭、豈復憂世瘼、會當期若士、相與踞龜殼、  
還自鼓山過、鰾溪遊、大乘榴花洞、瞻禮文殊聖、  
像謾成、  
乞得明時多病身、歸來林下養天真、芒鞋竹杖未全  
老、藥灶酒壺隨分春、山寺遙傳鐘磬晚、田家收刈稻  
梁新、試窮溪上榴花洞、恐有桃源避世人、



